

出使美日秘國日記

出使美日祕崔日記

十月初一日 晴 天氣轉涼

本日伯林報言布國戶部大臣密該爾擬徵收國中產業稅餉立有章程交下議院國人以為自增收煙稅以後煙業虧折今雖為增兵自固之謀而民生日困慮不能行云云 因按歐洲各大國勢成鵠蚌其不致自斃者英耳俄則借貸無門矣義奧則餉絀而兵不能增矣法則國債日積德則徵斂日苛皆相持不下所致也難矣哉 接天津電

初二日晴

謁律師梅詢此兩次照會外部駁詰禁工苛例外部之意如何梅

律師云正在商議照覆又詢各國會商議平金銀之價如何梅律師言必添鑄金銀錢金銀之價方平惜乎議院屢請而總統屢駁也又言美廷議以本年所餘撥償國債而商民不願收回以銀行屢倒無處存放云 因謹按光緒十年閩粵共借洋欸二百萬磅合銀九百萬餘兩按年八釐半起息又神機營借洋欸一百五十萬磅合銀七百萬餘兩按年七釐起息其實經手之滙豐怡和洋行所招股分中國之人居多而反假手於洋商者則以前此戶部行鈔失信於民也英法美德各國債息不過四五釐而我倍之致洋行居中得利殊失算矣

初三日晴

上月二十六日琿春來電言美國漁船於亞刻和斯刻海捕鯨爲
俄兵船所拘遂電駐俄美使向俄廷理論俄已認錯釋船并賠銀
四萬八千九百五十圓該漁船查琿春現爲俄國要隘除日本領
事外餘不接待而予日本領事之權亦不能優地方官皆武職駐
防官兵七千名兵艦六艘云 因查俄以琿春爲重鎮又造西比
里亞之鐵路達於琿春又造極大之鐵艦山克龍斯達至琿春中
途可不添煤著意經營不遺餘力彼固昌言爲興商務也豈其然
乎

初四日晴

美紳言明年美國水師大會據駐華公使田貝已接中國總理衙

門照會云中國海軍新創駕船員弁尙未深諳海綫礙難赴會云
又言俄國整頓水師年精一年兵艦日增近年所造幾與英國相
埒查所造鐵艦名尼哥拉士容八千四百四十噸業已成功又更
格容六千五百九十二噸那伐林容九千四百七十六噸又拿利
容八千零七十六噸以上一年可竣又洛力刻容一萬九百二十
三噸佛力格容八千八百噸北皮多拿容一萬二百八十噸司法
利脫利容一萬二千四百八十噸昔伐司都巴巴推佛倍脫羅破
拉三艘均容一萬九百六十噸尙有未命名之一艘容一萬二千
噸又海防鐵甲一艘容四千噸水雷船頭等十艘二等三艘巡船
十艘以上過此四年一律工竣各廠有法人爲之料理從此海軍

駕義大利而上之矣

初五日晴

美國前駐日代辦來見自言爲南黨與前任最相契今由鄉移居美都談次言美國欲於山德明哥國求一口岸以爲兵船添煤之埠該國畏其蠶食終不允從墨西哥國向產五金鑛沙運美售煉美商利之自美國加徵入口稅墨國因自設爐以煉遂知自煉之利較售沙尤厚竟不運美美政府雖允免稅而墨國已禁出口云

因按美於今日可謂專利無厭也求山國之口岸而不成加墨國鑛沙之稅而反失利是所謂自侮人而人侮之矣墨國鑛利與美同而向不自煉以利授人西人謂墨人最懶實定評矣今乃如

夢初醒實由美國之加稅而致此所謂困於心而後作也雖然墨國鐵路輪船開墾之利多不自謀其果盡能收回此權也乎

初六日晴

美總統已舉定嗣由各省公舉下議院紳共計三百五十六名計南黨二百二十四名北黨一百二十五名民黨卽農黨七名其中留任者甚多布萊爾亦在所舉之內云 因查美國下議紳屆二年一更改今年係更換之年南黨之紳多於北黨者幾倍之自此以後北黨之勢不敵矣

初七日晴

紐約省尼加拉城開河工程局所用挖泥機器係五千匹馬力計

價銀二百萬圓用之年久現已疲鈍該局因此河開通利益甚大遂向費城機器廠訂造極大機器一架須十四萬六千匹馬力限明年七月竣工一時聞者皆以爲地球至大之機器咸往觀焉

因歷至紐約矣跨海之橋以鐵造成約長數里懸空鐵路周環紐約約長數十里火車卽於其上行駛其房屋有高至九層者均以白石砌成或不用木計一宅需銀百餘萬圓其營造之巧而巨可奪天工所以然者外國有營造專家之學又有精藝之學講求有素出其絕技匪僅以侈靡飾觀也蓋有大用存焉

初八日晴

初六日倫敦來電言中國漕糧由滬運津不准英船裝運以爲有

違中美一千八百八十年之約中國政府以爲美廢約而禁華人
中國此約亦廢英廷遂詢諸美外部外部以爲禁華人事只廢約
中一欵並未廢全約云 因按此美外部欺飾之辭也美廢約中
准華人來美一欵中國亦廢准美船運糧一欵中國之理甚正也
且美首先廢約而中國卽廢全約其理亦至正也雖然因尙有進
於是說者美英於內地貨物由彼運此均不准他國之船攬載由
滬運津皆中國內地也例應禁也非他國所能干預也

初九日晴丑刻以後雨天氣轉暖

法國所造商船遇有軍務均可改爲兵艦遊弋洋而故於商務軍
務均有裨益茲法政府恐承平日久各商船以爲具文因將大西

洋輪船公司之那曼地商船試改兵船驗其是否合用云 因查
美國前造商船時卽有此議明者所見畧同德國方議增兵且禁
壯丁他往法亦籌及水師彼此鬪智鬪巧不待爭戰之時卽在承
平之日不待開釁之際卽在修睦之年從前殷兆 上疏謂始終
不忘戰其知幾乎

初十日 雪厚約一寸仍未止

卯初率隨員等恭祝

皇太后萬壽行三跪九叩禮辰初設麪申正設醴 初七日伯林
來信言俄政府電達伯林各銀行限六禮拜內將以前所存各銀
行之銀滙至彼德堡備用云 因查俄無可恃之銀行故銀存於

德國近擬增水陸軍兵添造鐵艦故以向所儲者供現在之用也
十一日晴

俄國自土耳其禁止各國之船於達滕尼來士河駛行大於調度
水師有礙故請諸土廷仍准俄船來往土廷似不敢不從土國將
軍布利耳門請在該河兩面建置礮臺以資防守云 因按此積
威所劫也光緒四年俄土之役俄兵已逼土都非英之援土幾不
國然猶割巴統阿達亨卡爾司三省之地與俄而賽爾斐亞門的
內哥勃爾加厘亞向之藩國均給地使自主土國歐洲之地所削
已過半矣英人嘗譏其武備廢弛所購兵艦永遠停泊而不駛行
上年駛赴日本之兵船中途沈沒此明效大驗也亦殷鑒也

十二日晴

美國西北各省沃野千里產麥極盛政府以其出口道滯爲之浚蘇山梅里河以利之貨產之由是河出口者一年之內計值銀一萬零二百一十一萬四千九百四十八圓向來英屬卡拿大商民運貨過此一律免稅近因英屬官待美商船苛刻總統遂創新例徵收英商之稅云 因查外洋好興大工工之所至利卽隨之如埃及之蘇彝士河法國之馬賽隄其稅入足以敵一小國若美之浚蘇山梅里河則專爲利民其用意微異耳至於因英之苛待美商而亦稅英商船以報之則大小各國無不如是 因之隨筆記之者一以見美之爲民興利一以見美之爲民防弊也

十三日晴

答拜美紳克力引觀玩器古甕瓶一具自羅馬來云二千年前之物大花瓶一座自法國來望之如金鐵鑄成瓶腹之畫十分工緻其餘古物甚多談次詢因到此幾年因答以三年惜美禁華人自前任駁詰至今歷外部三任均不見照覆也克力言前十年以來上議院紳向歸北黨專權今年下議院紳南黨已倍於北黨上議院紳雖未定然北黨斷不能過三十九人南黨則可望四十餘人明年議院之權南黨可操且總統亦南黨北黨勢不敵矣或有變更也

十四日晴

昨日謁梅律師未遇是夕又往見之言議院將開擬撰文照會外部外部曾許以交冬必有照覆且許以此意奏總統請下議院再議故宜問之梅律師允以次日申刻赴使館面議又聞上議院紳曾特派員查察客民來美實在情形以便立例各員已於十二日在紐約會商擬請總統於明年三月一號起普禁各國工人來美卽例所不禁之人亦必向美駐該國領事處領取護照然後准其入境云 因按明年三月卽新總統接任之期也自三月起再申例禁工是又由新總統禁工矣新總統卽喜禁工以媚工黨者故得復任則禁例之復嚴可知其由美國領事給照一端尤易上下其手於所難禁之國則給照於所易禁之國則不給照雖云普禁

亦不過禁中國而已此情弊之所以百出而交涉之所以難言耳
十五日晴

梅律師來見商照會外部事言歷年之所以駁例者非不辭嚴義
正特無如總統之不下議院改議何也總統之意始則媚工黨以
爲蟬聯之計今則又存五日京兆之見不欲多事且新舉之總統
卽四年前之總統卽創禁工苛例之人今又舉爲總統矣現任總
統雖不得蟬聯未嘗不覬覦四年以後故苛例難望除耳因答曰
美國上下之意久已洞知終不能迎合其意而聽之梅律師謂苛
例違中美之約不便於華人以前照會已盡之將何措辭因答曰
美國今一年中各國人民入境者計五十七萬餘人德國一國此

一年中卽十二萬人較中國二十年所積之人尙多美既杜絕華人之來源又欲迫已安業之華人使去美不爲華人計獨不爲美國之名聲惜乎獨不爲華盛頓創國之例惜乎梅律師以爲可談久已日晡遂辭去

十六日晴

考專管客民入境之員亞溫士所言自去年七月至本年六月止此一年中核紐約一埠歐洲來美客民除逐回二千八百一人外共得入境者德國十一萬九千一百六十八人俄國七萬六千四百一十七人義國六萬一千六百三十一人挨利士五萬一千三百八十三人瑞典四萬一千八百四十五人波蘭四萬零五百三十

六人奧國三萬二千九百三十五人和國三萬五千七百二十四人由英屬卡拿大及墨西哥二處入境者尙未計云 因按歐洲入美人民如此之多僅禁華人曾何益哉不出二十年美當有人滿之慮矣

十七日晴是日美國開議院

十一日俄都來電言國用不給挪借不得已設法加稅所有國人例免當兵者按名收稅銀三羅布公司資本向來按年值百抽三今加稅爲五間有免稅之商今亦一律取稅每年共增收銀三百三十萬羅布十二日復來電言又於蒸酒煤油二物加稅云 因按俄之稅則本重故其民心喜亂今值大飢之後叛亂頻仍

不聞休兵息民而屢聞加稅亦可見民之憔悴矣願其兵強實足靖亂故民心屢變而國勢不搖此亦古今所無之霸道也

十八日晴已後雨

十二日倫敦來電言哥喀薩司山介歐亞兩洲之間俄以要隘常駐重兵近聞俄廷下令調駐該山之馬兵三隊赴德國邊界駐紮以備調用云 因按俄以費用不給告貸於歐洲各大國無允貸者卽聯盟之法國亦不願貸乃議重稅國內商民而兵終不戢既踞巴美爾不畏中英之詰責又挾制勃爾加厘亞又挾制土耳其其又調兵駐德國邊界狼奔豕突卒歲不休何未聞有人焉一挫其剽悍之氣耶畏其強也

十九日晴

美國專管歐洲民人入境之員以歐民入境太多有礙美民生計
擬例四條上之議院一自年十二歲至十五歲不通本國文字者
一五十五歲以上無家眷者一人赤貧隨身銀錢不過一百圓
者一無美駐該國之領事所給執照者以上四項人皆不准入境
由明年西三月一號起試行一年云 因按此禁歐洲各國人民
入境之例前三條皆易混淆惟給照一層則其全權操之美國然
仍可由領事通融焉蓋美於英俄德義各國不敢操之太迫持之
太堅畏其抵制報復也

二十日晴

謁外部科司達寒暄畢因言前此相見時所許交冬必有照覆今其時矣敢請科司達曰此案本國外部自拜亞布連至今凡三人前兩任既不能覆故本大臣亦無可覆者因謂前借金山商董管謁時該商董請於開議時由貴部奏總統下議院再議貴大臣允之此次諭議院文未見何耶科司達曰領照新例議院議定總統批成不能反汗也因謂何以一千八百八十二年總統阿他以議院禁工例太苛下議院再議耶科司達曰彼時尙未成例微不同也且貴政府之意如何因曰我政府屢照旧貝謂新舊兩例均不公有悖中美兩國之約科司達曰中國如以此例不便當須換約約成則例可廢因言現在之約既不守而用例多約何爲科司達

面藉似嫌語太重良久則曰俟與總統商之如總統以爲可照覆則照覆耳因辭退

二十一日晴

爲駁苛例事又照會美外部 借彭參贊凌繙譯見梅律師梅律

師言總統明年西三月

即中歷正月

卸任似不願開罪於工黨外部科

司達尙有告退之意均無心辦此事矣因謂總統不將我政府屢

次照會田貝之文交與議院是有意爲難也該律司謂彼何意爲

難只迫於工黨耳前批例時已自貢其實情矣因謂明日見外部

擬仍固請再看如何梅律司曰可仍當一面由華商延大狀師控

駁庶乎有濟因諾之遂回署發書於金山總領事屬其及早綢繆

焉

二十二日晴

昨日外部科司達專函訂本日已正面商要務因屆時而往外部
卽接見言昨日所遞到照會文其中語氣有欠和平之處恐於兩
國交誼有傷故請惠臨面商壹是因謂我所求者不過請貴大臣
商諸總統將我政府數次照田貝之文及本使館此五年中照會
之件盡數發交議院再議耳科司達曰例已成矣無可再議因曰
例不再議我政府及本大臣照會豈不應議覆耶科司達曰二十
日相見時已面允商之總統矣又復照會何爲因曰前大臣布連
屢許必有照覆而終食言本年六月貴大臣亦許交冬照覆至今

尙未見到故不能再三催耳科司達曰美國之行例實由光緒十四年兩國所訂之約垂成中轍欲其廢例必先議約此實際也此次必有照覆卽本大臣因公他出華頓亦必照覆至此次所來文語氣太重請帶回修飾之如久無照覆再遞何如因允之遂退二十三日晴

公法載兩國交戰兵力所到無論敵國境地不得蹂躪安分商民前德法構兵德兵入法卽出示諭法民秋毫無犯此德之能守公法也惟公法只言陸軍而水師實不同故於敵國之船不論官商均准掠取是兩歧也茲德國議紳請政府致意各國派員會商可否立例照陸軍公法庶能保護商民財產云 因按此舉若成誠

爲王者之師合乎古人非敵百姓之意然度必不能成者何也當
今海軍以英法爲強英人好拓地法人好構兵此法若行則不能
橫行海上於以知英法之必不允行也

二十四日晴

接美外部照會當飭繙譯略譯其中大意言美國之所以行例始
於光緒十四年而所以行例之由則以其時兩國所訂新約垂成
而中輟廢約之故不能專責美廷欲中國遷就予以可轉之機則
約成而例自可廢云云其他悉係強辨之辭

二十五日 雨天氣愈煖

是晚赴外部席下議院紳火街先到因次到火街爲因言伊之本

省商廠農業甚賴華人不附苛禁華人之例爲農商計本至公也而同院頗有譏之者伊無所私亦何所畏因答曰華盛頓爲美國第一人所創國例不分彼此各有自主之權君所行者與華盛頓同心與創國例相合何歉於心火街遜謝談次賓客陸續而到義奧瑞士土耳其共四公使上議院紳福來衣士谷白得勒下議院紳火街姐門皆不附工黨而愛華人者共一人爲科士達之同鄉賓主共十四人飲至亥正而散

二十六日晴

昨夜席上聞義公使言本國議紳詢於外部云聞德奧義三國聯盟近已瓦解信否外部曰聯盟之局以保昇平三國均大修武備

敵國稔知自不輕動而又以至誠之意和合鄰封使敵國解怨釋
讎幡然修好凡此皆所以致太平而非有狡焉思啟之意也議紳
聞之大悅 因聞是言而知立國之道焉修武備則雖讎我之國
不動干戈輯邦交則雖夙怨之邦亦敦和好反是則思啟封疆者
必以我之弱而蠶食夙有嫌怨者又伺我之隙而責言治亂不同
其實一理也

二十七日晴

至外部處謝席並謁同席之上議院紳福來衣士谷白得勒下議
院紳火街姐門等福來言由歐洲來美之人較中國約二百餘倍
中國約十萬人歐洲約二十兆餘矣惟歐洲人服食起居相同故

美人不厭而亦難禁相忍至今亦決不能不禁此次議院必議普
禁中美已立限制之約但使美關認真辦理十萬之外諒不加多
亦何所礙惟一千八百八十八年及今年苛例殊違兩國之約耳
因以爲公論焉

二十八日兩

拜發續保人員奏摺 二十一日奧都維也納來電已加兵額三
千六百名從德君之意也二十四日德都柏林來電言德之增兵
實爲自保之舉而俄廷見德此舉頗不放心亦擬增兵以期勢均
力敵云 因聞此而歎歐洲各國有騎虎難下之勢也有鷓蚌相
持之形也孫武子云勇怯勢也強弱形也形勢所見雖智者無可

如何先事而綢繆者恐形見勢絀而敵國有輕我之心也將事而整飭者恐勢不均力不敵而無以拒敵也當今之勢無以和局爲可恃無以武爲可掩無一日而忘戰斯善矣

二十九日 小雨竟日

美國武員布郎考究造礮之法自出心裁創爲分節而造外有鋼綫裹之堅固異常查尋常大礮連放多次往往炸裂此礮入藥加倍屢次轟放毫無損傷云 因查前膛之礮變而爲後膛已適用矣陸路新式之礮分爲數節可分可合以便取攜行之已久然其礮不甚大也因始以爲小者可爲大者亦應可爲今果然造成矣然兵船之礮不在乎取攜之便而在乎及遠之能此種新式不過

分節而造何以入藥加多殊不可解矣

三十日 陰小雨時見口色

俄副將名達位大甫被人刺斃該副將素與尼希利黨爲讎想係彼黨所戕又俄國大饑之後又遭疾疫近查民冊疫斃者計二十六萬五千七百六十名云 因讀左氏范文子之言曰外甯必有內憂俄之強也蓋不虞外侮矣乃不能制尼希利之黨禍伏蕭牆災祲薦臻是上不能安而下不能全也豈天道之忌盈耶

十一月初一日 雨中夜大雪

接湖廣總督張之 電屬代買棉子十頓當卽函屬紐約領事速爲購定因查俄國南方各省其土宜種棉花俄政府遂由美國購

棉子試種其初種不得法所收甚微嗣由農部悉力考究近年所出之花既多且佳竟與美國如一云 是晚赴外部科司達茶會日本朝鮮公使均與餘係紳士亥正而歸

初二日大雪至午而止

近祕魯以整頓武備於常稅之外又加值百抽五美下議院紳司

歌德請增蒸酒之稅每格倫

合中國約七勛半

加稅一圓二角五分每年

可增稅銀三千五百萬圓云 因嘗至祕魯矣考其稅則已爲至

重今加值百抽五則每百抽二三十矣蒸酒者蒸穀氣而成酒卽

中國之燒酒是也美國酒稅本重以其非日用所必需也今每格

倫加至銀一圓二角五分則每觔加至一角六分六釐稅重極矣

中國效之收稅當可十倍焉

初三日晴

卯正率各員朝賀辰初設齋申正設醮 二十八日柏林來電言
三國聯盟之局實因義奧兩國互相猜忌竟不能堅殊爲可惜三
十日又來電言一千八百七十九年德法構兵非俄國派兵駐守
德國疆界與人必躡其後德之勝法俄與有勞乃德今主卽位與
奧聯盟而不親俄俄實恨之今德主見奧難恃擬復親俄近已調
派駐瑞典之公使威德赴俄以該員向爲俄主所信重者庶俄德
交誼復固云 因謹按歐洲縱橫之局成而各國防患之心切古
人所謂日慎一日完若金城者今於各大國見之此外弱小之國

有無可布置或效燕雀之處堂者非亡則削矣

初四日晴

謁梅律司商駁美外部照會事律司以爲中國多方駁詰而美國之禁工自若不如予以可轉之機卽與換約因於限制之中寓通融之意堅求實際勝於徒託空言因謂此事當山兩國分任因當以美外部覆文達之總理衙門美當以中國歷年照會發交議院俟察看兩國之意若何如彼此意見相符然後可言修約之事因此時不能遽許也律司以爲是俟商諸議紳中之相契者

初五日 飛乾雪如粉晴

威內薩南墨洲之國也地廣人稀招人開闢築鐵路造火車者多

他國之商遇有事故往往向威政府索賠茲威廷鑒於前車訂立新例一所有火車鐵路之權准公司承充不准一人獨霸二所收貨車客車等費由議院公議不准訛索三該公司所得之利國家按百抽五四該公司建築動工以後如有爲難之事當向地方官控告不得強國家政府代爲把持云 因按鐵路之裕國通商便民誠當興造然由他國爲之不免有弊既有見聞紀之以備採焉
初六日晴始冰

英國於屬地卡拿大諸與美國相連之湖添置巡船美紳以爲違約外部查舊案始知非違約也茲美水師部派員查諸湖商船有可充兵船者以備兩國決裂時能護本國商船并攔敵國商船之

用茲查有數艘可用者仍當添造以期勢足相敵云 因按歐墨
洲各大國共不忘戰固共見共聞矣而更不諱戰者此交涉之機
也德與法時時言戰俄德之君至以戰相聞美自祕林海峽事
與英齟齬振興水師不諱戰英英於巴馬耳事不諱戰俄俄亦不
諱戰英然後知試槍礮添兵艦勤操演此戰勝於軍實也論曲直
爭形勢比權力此戰勝於口舌也然二十年中各國終不一戰者
則交涉之機可知也曰恃不忘戰不諱戰以止戰也

初七日晴

是日爲耶穌生日又爲外國冬至節 自總統創禁英國漁船在
祕林海峽捕海龍英人不允遂至齟齬於今二年英美兩國均派

兵艦互於該峽相掣漁船美勢究不敵英遂至形見勢絀俄人又踵挈英美兩國之漁船美廷益難抵制現總統不得已擬派能員赴英商議此案其意蓋欲言歸於好微聞卽派外部長科士達但尙未見明文耳 因按美國近年所行多侈然自大之象責言於智利索地於海岱爭權於檀香山立報施之約加入口之稅不獨歐洲詆其專利卽本國官民亦言之而普禁客民又爲歐人所不願大抵因顧國體相持而莫肯先發祕林海峽一事則英人直昌言不讓爭之累年美於是自求轉圜蓋虎頭蛇尾矣

初八日晴

從前美政府派員赴中南兩墨洲測量地勢可否興造火車鐵路

連墨洲爲一氣以便通商近日該員回美謂所過地方雖間有大川巨浸然其工程較美國自東徂西猶易爲云 因按自火車創行後各大國無不以此爲裕國通商之先務有疑之者或以兩國交兵利於攻而不利於守爲言不知鐵路之於行軍利於主而不利於客蓋自炸藥興而鐵路隨處皆陷非主國可步步爲之而客軍不能也俄君亞林三德之事可證矣

初九日晴

謁上議紳宣文宣文之兄曾於南北花旗構兵時血戰立功上年已歿美官紳爲之仿格爾脫之例鑄像紀功光緒十五年因謁見時諄諄爲因言中國宜設鐵路以行軍則強以通商則富以達曠

遠之地則民不患滿美國工黨權重華人到美向不入籍終難容也此次宣文又言之宣文恂恂有道氣極駿禁工之例今老矣惜其不得總統也又謁多福摩根拗丹柳表好德巴麻等中夜回車初十日晴

上議紳宣文好德均來答拜談次知英人於緬甸漸次經營查得境內低山可以播植茶葉兼種茄非現已試辦惟其地雨澤稀少應導水之來源兼以灌溉之法并興辦自來水以爲食用之需約需費一百餘萬兩云 因按緬甸越南終古自安荒僻旁觀者亦以爲無可設施乃英法得其地而商務農務以次而興百年後當繼香港而繁盛矣然則人力固足憑也

十一日晴

下議紳好德火街來答拜言俄人於西比里亞起造鐵路共東之歐沙粒江一段急求工成此地距黑龍江之北計程一千一百英里火車半日可到又西悉北爾之東烏蘇里之鐵路現用一萬二千人興造亦欲速也 酉正赴副總統席各國公使除英國墨國外到者二十四位外部科司達居首席酒用五品飲至亥正而散
十二日晴

初四日巴黎來電言近查得巴拿馬一案法國部臣受開河公司賄賂者五員已由議員參辦矣本日俄都來電言俄政爲君主法政爲民主俄法聯盟本屬強合前此雖有是舉亦不能堅茲法國

內政不修官箴不肅巴拿馬開河一事足見其徇利忘義不能治
內安能制人與之聯盟實爲無益現俄國頗有悔盟之意而與德
修好云 因於此而歎立國之不可不強也俄法聯盟之舉俄欲
拓地法欲復讎耳乃憚德之強相持而不敢發而俄人方興築西
比里亞西悉畢爾之鐵路是其意隱將有事於東方而顯然與德
爲讎殊非計之得者故欲親德而釋怨也俄德相親則歐洲可無
事而兵力可專注矣然則鐵路告成中國其有邊患乎

十三日 晴未刻見雨稍止中夜雨

十一日彼得堡來電言俄國聞德主之妹于歸有日俄君后擬由
俄赴德以觀成親之禮想以此行爲聯絡邦交俾兩國以前之齟

齟可以解釋云 因按天下之勢兩相敵則平凡人之情兩相求則合此古今治亂離合之機也漢與晉頓和親而宋不能得於金元呼韓稽首於唐而契丹乃廢置石晉情勢殊也俄於土耳其則伐之於勃爾加釐亞則更置之於德則始嫌而終親之情勢殊也此可以得交涉之機而爲發憤之本焉

十四日大雨竟日夜止

是日爲美國元旦總統以其夫人新歿故不見客各部大臣亦不見客遂無應酬惟繙譯官不理事耳 美國管收內地稅員已造成半年入欸册收稅共七千四萬五千七十圓六角八分內蒸酒稅三百二十四萬餘圓釀酒稅一百三十八萬餘圓煙稅七十四

萬餘圓此外牛油稅雜稅地稅居多云 因按此美國半年內地稅而入口之稅不與焉煙酒二項已五百餘萬圓合一年計之則一千餘萬其收稅固重然泰西各國均以此非人生日用所必需故有意重其稅也

十五日晴

美國添造新式鐵艦二艘需鐵甲七千噸計銀四百萬圓本月卽招商承辦惟美國現在造艦之廠不能制甲僅賓省之白寺里廠及家尼記鋼廠能製鐵甲耳近金山之友仁鐵廠現亦購置新式製甲機器以期承辦製造鐵艦云 因按美國於水師向不經意風氣未開近日以英義兩國交涉之難遂爲補牢之計而製造鐵

甲尙費躊躇於以知現時武備迥異昔時水陸兩軍非講求數十年不能操勝算也若商務不旺入款不充則雖欲講求而如無米爲炊更無操勝算之日矣

十六日晴

謁外部科士達華頓又至義日墨使館答拜聞南墨洲之智利巴西兩國聯盟以防外侮而巴拉圭亦願附入巴拉圭已購新式槍一萬枝并延智利兵官教戰云 因按周公言未雨綢繆孟子言相友相助春秋列國時時合盟中外之人心國勢無二致也智利勝祕魯而受屈於美巴西改民政而受侮於俄且英之蠶食已漸肆於墨洲此不可不慮也因又考亞洲各國中俄日本比鄰而俄

人好兼併日本亦效之俄之強也固不資輔車之依日本亦復夜郎自大結怨鄰封何耶

十七日 下乾雪時下時止午後大雪至夜而止

美國煤油之利幾徧地球其分支公司設於德國德國自產煤油之利遂爲所奪茲德國之布雷民埠擬自集股另設公司不令美公司獨專其利惟美公司資本甚大所有同業與爭利者均被擠倒不知該公司能與相持否 因按自泰西各國通商於中國而中國之民失業者多美國煤油入口後而青油遂廢棄桐子一物產於地者棄於地矣德亦產煤油乃以價值貴賤相差而被奪其利中國方興冶鐵織布諸局苟非局無冗員糜不虛耗未必能與

洋鐵洋布相持也上海紙局共前車也

十八日 大雪午後時見日

十四日伯林來電言歐洲各國現在均需欸孔亟難於設法惟有借貸茲奧國擬借巨欸與本國富商商訂計年納息四釐德國亦然月內均可說定云 因按歐洲競尙強兵而防他國之蠶食兵餉日增遂無底止德奧義皆稱大國而奧尙富於義德且富於奧猶且入不敷出既籌加徵復求借貸幸其商務尙旺不必乞諸鄰耳否則如葡萄牙埃及各邦終不免於鬻地受制也

十九日晴

梅律師來商議

紳事以使館自光緒十四年至今所駁美廷

禁工苛例美外部并未移交議院本年九月照會美外部請奏總統將所有駁詰禁工照會發交議院再議外部照覆其詞隱約嗣查得除總統外外部實無此權總統已歷兩任既不願交非議紳建議索此項案件不可故與梅律師商議密託議紳梅律師已將所可託之紳送一單來并其居址擬即日往謁焉

二十日晴

謁上下議院紳見亞威得窪而好德楷麻夏一芬麥豈力五人而楷麻尤關切言去年會議新例卽不以爲然又言英國擬貸銀三萬萬圓與日卽收古巴之入欸以償其本息查借貸爲各國常事惟英人往往以保護本國商民爲名而卽藉以奪他國之土地爲

各國所稔知想日國政府未必受愚而美國與古巴比鄰斷無坐視之理云 因按當今之世弱肉強食以爲常損人益己以爲利稍不防備卽墮其術中矣埃及祕魯至以國中權利授英葡萄牙土耳其墨西哥亦將踵其轍焉俄強而土地不可得今年告貸遂無應者蓋知其不能脅也此可以見其心矣

二十一日晴

美廷整頓海軍苦無添煤之埠雖與瀕海各國商請購地多不允從其允者亦須大工開闢動需數十萬金近水師水員思得海面添煤之法能使兩船不碰有利無害其使實多云 因查海面風浪難得靜時浪不靜則船不相碰或碎或散故海面

不能添煤而必須泊也然人之聰明無限船之用帆者既易而爲輪矣豈兩船竟不能使相近耶如其能成則英法兩國之到處踞埠者不如此之隨處有煤我

國方與海軍本境之外實無一埠但學其法則不慮無煤矣

二十二日 大雪中夜大風

謁總察院見傅士播郎斐路不綠瓦餘未見又見下議紳克樸爾聞俄國政府預籌明年費用較今年多八千一百萬羅布爲築鐵路計也其最重者爲西比里亞自西而東環繞中國邊疆分段創造山太平洋至滿洲界計用工人一萬二千名不難尅期告竣其西段已築至參麻根又展至廓干離中國西疆僅百米耳又擬築

鐵路直達阿富汗波斯兩國又由俄都達北冰洋之阿干乍爾海口共計四百五十米不日可成其火車全用電氣行駛云 因嘗於光緒九年疏陳俄人將爲中國之患其地已包中國之東西北界處處可入今營鐵路如是其急其心叵測宜思患預防矣

二十三日 雪止晴

謁下議紳見安多羅好德蘭打路陌克力哈打英吉利士六人蘭打路英吉利士二人尤關切談最久均以禁工爲違約又聞昨日接羅馬來電俄法聯盟義國駐法公使密用離間之法使之齟齬乃天主教王知其謀卽飭其駐法之使轉告俄國駐法之使使義國之計不行而俄法之交離而復查俄之於天主教限制極嚴

今教王如此欲媚於俄以求容云 因聞此而歎立國之當強也
天主教始於晉末其盛時能廢立各國之君自德勝法而法不能
護教其權遂替近德俄義美各國限制極嚴法之各部亦厭之教
王乃自貶以求媚於俄法可謂知權變者亦衰弱之勢使然也

二十四日晴

謁各部見外部兵部水師部戶部內部聞美國派駐土耳其公使
檀臣乘本國兵艦赴任將抵土國之司麥拏海口土王特派官輪
迎入其故因土都地當要隘爲地中海黑海往來必經之地向禁
各國兵船出入土國與歐洲各國有約其意在限制俄國兵船俄
之海軍頗強格於約章不能出入如或入地中海則英之蘇彝士

河不能守險法義兩國海口亦當其衝茲土王甯特派官輪載美公使入都不令美兵艦違約恐俄國藉口也 因按歐洲各國限制俄國兵艦由地中海已久聞之蓋各國之善於防俄也茲於土王派輪一事見其善於守約也凡交涉之事當慎於始如各國之防俄是已當防於微如土王之於美是已細針密縷否則必受挾持焉

二十五日

晴時見霏雪

謁上驛院紳見寒得沁地甫司果勒門三人因相隔遠成正而返聞德國之克虜伯廠與格虜純廠齊名近合而爲一克廠善煉鋼造巨礮格廠善造鋼甲鐵甲又善造穿甲之彈均爲絕技今互相

考核更期日益精云 因按歐洲諸富強之國非僥倖富強也其上下所講求者日以通商興利開礦設廠爲務均有專門宜其富也其水陸之軍日以操演測量爲務亦有專門宜其強也其國中各廠林立日以煉鐵煉鋼製礮製船製甲製彈爲務既以自用又以售人宜其強且富也大抵人之聰明日用日出用之於有用與用之於無用其用相同將何以使天下之心思均用之於有用哉是在乎轉移風氣者

二十六日晴

上議紳果勒門來答拜談久言近日法國以兩國交兵運調最忌麻木戰場之上尤貴號令靈捷方能使將之於兵如身使臂而臂

使指近武員中有留心考究者知用電氣至爲便捷另備一種收發電音之人其裝束與兵異以頭戴小帽爲誌取其一望而知置電機於身并帶電綫計長三里有餘重不過六磅云 因按電氣之用泰西漸推漸廣德國用以生力俄國用以行火車美國用以行舟行車至以遞書信傳言語代燈燭則各國已恒有近電學家又用以代煤而烘茶惟其心思不窮故其用法亦不盡也至於疆場用中號令自爲靈捷先儒呂新吾云事前優游事至慌亂凡事不宜兵家尤忌泰西用心其知此道夫

二十七日 陰未後大雪

謁上議紳巴麻不誅批化下議紳巴堅士好布堅司加來兒馬丁

等談次知二十五日伯林來電言德主赴西馬林安城觀羅馬尼亞國之太子成婚禮此地距法疆甚近遂附火車聲稱赴喀爾司路埠乃到該埠不住卽往司脫拉士堡城此城爲德法交界要隘德有重兵駐守德主意在出其不意察看情形而駐防將卒僅於數分鐘時率兵嚴陣以迓德主見軍容整飭知無隙可乘甚悅云

因於此而歎陳之宜亡也高穎破陳之日於後主榻下得陳將告急文書蓋猶未啟封也亦於此而知漢之宜興也高祖馳入韓信營中奪其軍符而韓信不覺也野史載戚繼光備邊將士點名大兩猝至植立肅然無一人離伍者此其所以百戰百勝也德主所行德將所能聞者頗爲驚異而不知中國已有其人也

二十八日 大雪

柏林來電言俄國向章建造鐵路不准在他國購買材料所以保
本國之利也惟現在方興大工又求速成而本國所產實不敷用
茲俄政府擬變通以求速准其購之異國德國聞之甚喜以德俄
比鄰可得此項利益云 因查歐洲各大國無不欲自保利源亦
無不欲興造鐵路購材料於異邦則土產棄於地惜經費而不造
鐵路則利源不能興二者皆有所失也俄造鐵路向禁取材異國
其策誠是今以材料不敷而弛禁則權其輕重而出之也與其防
漏卮而利不興不如興利之爲愈矣嘗見窮乏之家非不儉嗇而
畢世饑寒者惰累之也力田服賈自奉常豐而尙有蓄積者勤爲

之也此言雖小可以喻大

二十九日晴

謁下議紳見寒得遜葛累堆二人聞美國貨船由北遜之湖駛出海口必經英屬之河英稅關常與爲難美國屢次照詰英人置之不理上年美議院遂一面議開河道使船由湖直達海口一面亦以限禁英船抵制英商苦之茲英屬改除舊章凡美國貨船由英河入海者稅關概不留難云 因按萬國公法地球通行而弱與強之勢不同卽從與違之情各異大抵強者自執藩籬但以公法繩人而不以自律也惟抵制之法則使之不得不平如楚子木欲屈齊而晉以朝秦抵之楚成王方圍宋而晉以分曹衛制之外洋

交涉亦如是耳試卽以近數年之事證之德奧義三國聯盟俄法亦聯盟德君聲言兵力足以勝俄俄亦聲言兵力足以勝德法人以爲兵力足以復讎德人亦謂兵力足以一戰此以實言相抵制也造鐵艦者以防礮彈而制鐵艦者又造水雷造水雷者以轟鐵艦而制水雷者又造鐵網此以機巧相抵制也美英爲祕林之案互捕漁船法日爲新約未成互增稅則美加墨西哥入口稅墨亦加美國入口稅英欲制俄之佔巴美爾俄以取印度抵之法欲制英之脅挨及英以突尼斯之礮臺抵之此以報復爲抵制也綜觀各國交涉之道援公法者十之一用抵制者十之九且援公法者必有抵制以爲之繼否則我望以就範人視若弁髦我自言而人

自行將何所底止哉英稅關與美爲難美知駁詰無益卽以限禁英船抵制一舉措間而英卽改除舊章此明效大驗也

三十日 晴雪漸化

美駐古巴副領事布冷格來來謁談次言古巴虐待華人前此伊與陳蘭言之中國遂與駁詰得除苛禁今華人出水火矣因謝之欸以茶果又聞瑞士國現舉之副總統富萊之前遊歷美國大書院學兵法有成值南北花旗構兵卽投効軍營充當兵弁事靖返瑞迭膺重任四年以前兩充駐美公使今又爲副總統云 因查二百年前俄主彼德少時曾充英國兵船水手近德主威棧第一亦先充奧國兵官美之華盛頓格爾脫皆由兵官而爲總統者

上年勃爾加釐亞之君哈吞腦亦起自行間不足異也英王孫現充鐵甲船主俄儲遊蹤幾徧各洲奧儲又將遊歷歐洲羣雄角起逐鹿爭先風氣使然亦藉以增長見識也

十二月初一日晴

至美紳布冷格來寓答拜又赴上議紳富施士茶曾聞埃及國所派外部大臣白芟英廷以其並未相商立飭撤任查埃及因欠英國巨款英與埃約歸英保護國事須商之英必英允准方行此次更換部臣竟不與英商議或謂係聽俄法兩國之慫恿也英駐埃使阻之不從故英廷電飭埃王限於十二時辰之內立將外部撤任云 因查外國之所謂保護者實卽干預也許其保護卽許其

干預終必奪其權易其君臣踞其土地而後已俄於諸回部英於緬甸法於越南皆前事也埃及有俄法之爭權故不至於驟替然終亦必亡如芬蘭之爲俄德分裂而已

初二日晴

十一月三十日伯林來電言德之敵國首推俄法然一旦有事又必有附俄法者二十年前德國曾以重兵伐丹奪其二省之地懷恨已久今俄主又係丹王之婿俄德開釁丹必助俄不可不防云

因按昔穆姬嫁於秦而秦虜晉惠公晉懷公娶於秦而秦殺晉懷公婚媾不足恃也俄主爲英后之甥而屢欲奪英之屬地俄之婚媾尤不足恃也晉假道於虜以伐虢還師滅虢交好不足恃也

俄約羅馬尼亞以伐土耳其還師奪羅馬尼亞之地交好於俄尤不足恃也丹國未必助俄俄亦未必資丹之助但德之謀國者自富未雨綢繆耳 赴上議紳可六茶會

初三日晴

謁梅律師聞美外部近接墨西哥消息言墨國近立新例於各國保險公司之設於其國者必須向墨政府領照方准開辦又資本二百萬者須以百之一交政府收存仍另收照費云 因按外洋各國之稅重矣其征他國之稅至重者所以保護本國利權也其征本國之稅亦有重者所以激勵游惰也其收煙酒之稅尤重者所以限禁糜費也惟不徵出口之貨稅所以暢銷本國之產不使

棄於地也所以使物產之成本賤於他國以奪他國之利也其中
間有征出口稅者則以其物爲本國所少或本國所需故限制之
使其不盡出口也英屬印度之於鴉片征稅極重則以鴉片爲本
國所獨產又與中國有約不憂他國之奪其利也此孟子所謂孽
孽爲利也然而風氣使然不如是則削也滋甚矣

初四日晴

美國近來藉口防疫凡歐洲各國商船入口者必停口外二十日
驗明後方准入口以致客貨來美阻滯無利可圖故各公司暫停
運載三等艙搭客而此項搭客每於數月之前先期買票茲仍持
此票向德海口附船船主不收德俄奧三國貧民進退維谷無可

設法云 因按萬國公法各國條約惟弱者守之其強者任意解說陽奉陰違非一日矣美國禁華人入口則令領照禁歐洲人入口則云防疫其行法有剛柔皆背約也俄奧諸國雖未允其禁工而不能駁其防疫使其船不卽入口則往來滯而無利可圖船主自然不載此種貧民而來者自阻矣美人狡矣其實各國皆如是也

初五日 晴寒度似皖省美國人以爲極寒矣

謁梅律師商議由議紳請將本使署歷年照會請總統交議院詳閱又聞南墨洲之海代國有監禁美國商人米士案美公使辨駁海代國置之不理美使因事返美美此次特派兵艦送美使赴海

代嚴責以賠海代國以爲美廷恐嚇可厭仍置不理茲美廷擬添派兵船云 因按交涉之事雖千變自熟於此者視之直以爲依樣胡盧耳大國之陵小國其常也稍不如意則肆索詐其常也索詐不遂繼以兵船其常也戰局一開索賠益鉅其常也海代國何以不知耶則以天下如是而美國以前尙不如是也今非昔矣

初六日天煖冰釋

昨日伯林來電言奧國向本國富商貸款茲已成議銀行以九二折交政府而以九四折出售民間一挹注間銀行每一百萬得二萬云 因按歐墨洲國家貸款多有折扣其無折扣者英美德法而已俄之貸款有六折者且貸諸他國故其兵強而用不足英法

各國國債雖多而實貸之於本國之民其利不入他國故國不貧中國貸款向山滙豐銀行其集股與奧之銀行相似且內有中國富商之股惟貸入者不受扣而折扣於貸出之股商其法不同且所出之息滙豐亦不全與股商共利大矣夫貸款何以必由滙豐以利授他國銀行應思所以挽回之術也

初七日晴、

上議紳黨參之女來見葛累堆之房東來談逾時聞俄法聯盟以防德奧義德奧義聯盟以防俄法非一日矣茲德以奧義之貧弱不足恃俄因巴拿馬開河之事亦以法之無政不足恃德派俄君舊所悅之公使威德以駐俄俄主甚悅茲德君之妹不日于歸俄

君特派其太子屆期躬詣德國觀禮以示至好德國官民間之大
喜以爲此舉可見兩國解讎釋怨之徵云 因按富與富合貴與
貴合此恒情也而強亦必與強合強不相若則合之必不堅俄之
於法德之於奧義是已強而相若則離之亦不久俄之於德是已
孫武子曰勇怯勢也強弱形也形勢相當者不輕啟讎其不相當
者雖朝聘不絕玉帛在途終不免於吞并宋之於江南於蜀元之
於宋是已

初八日晴

智利都城佛爾巴來蘇來電言智廷近訂稅例於巴國進口西貨
物均增重稅巴西駐智公使即駁其例謂智國如必重稅巴國亦

將效之并禁智國貨物入巴西云 因按智利與巴西接壤南墨
洲之國智利最強近因內亂經年各國索賠以致入不敷出又監
於美之兵船挾制大修武備兵餉不足則以加稅彌補巴西壤地
雖廣而人口凋殘久爲智利所玩故加稅之例先於巴西巴西公
使以此事不能不駭又慮空言不足取勝故以抵制要之意其必
稟政府之意而出此言也蓋稅則本國之內政各國可以自由我
駁之而不聽從則彼之可以自由者我亦可自由也此物此志也
初九日晴

謁上議紳見宣文地甫司及布生三人美國考據家統核歐洲各
國兵費甚鉅按年計之英合國用百之三十七俄合百之二十九

法合百之二十七義合百之二十二德合百之十八奧稍減於德
至各國債息以入欸計交息義需四成又四奧需二成又九法需
二成又八英需二成有七俄需二成又六德需一成 因按英之
每年入欸約銀四萬萬兩以三十七分之則每年兵費一萬四千
八百萬兩矣義之入欸約銀三萬萬兩以四成分之則每年債息
一萬二千萬兩矣益以兵費百之二十二則銀六千六百萬兩矣
兵費債息合之爲一萬八千六百萬所餘僅一萬一千四百萬兩
以爲各項國用宜其不敷歐洲重斂暴征所入雖多而國用尤鉅
皆相持不下爲之也至葡萄牙國以所入交債息猶且不敷更無
論矣

初十日晴

接福州將軍希 閩浙總督譚鍾 信言美駐閩領事葛某和平
并屬查銅鉛之價 比利時國鐵路公司與法公司合訂火車改
用電氣以期迅速每一時辰行一千里準兩月之內一律變換云
因按電氣之用漸推漸廣輪船火車駛行向用以火灼水之氣
今改用電則無需用煤炭每一時辰行一千里由法至比不過六
百餘里不必一時即可到矣地球之徑只九萬里以電車繞地球
不過八日即可徧矣且兵船航海每患無埠添煤此則亦無患矣
前聞俄奧兩國已行茲法與比又行之風氣既開勢將徧及各國
正不知何所底止焉

十一日晴陰

初十日倫敦來電言英國商輪之數甲於天下百餘年來獲利極巨近日商船無貨可運停泊各口者計四百七十九艘計容八十五萬六千噸另九十九艘在歐洲各口候貨亦無貨可載商務之陡衰殊所不料云 因嘗閱使館舊案當陳任時中國庫平銀一千兩可滙美銀一千五百四五十圓鄭任之初亦如是至交卸時則減至一千二三百圓至張任交卸時又減至一千一百零五圓今年又減至一千零十三圓冬十一月減至九百九十七圓前後十四年之間中國銀價之落已逾七折亦可見外國之專利矣

十二日小雨

北墨洲之地本屬法國嗣爲英踞只存數小島法民於此捕魚者
船數百艘法政府爲寓兵於漁之法無事則任其捕魚爲生有事
則用以當兵効力爲養育水軍人材之計故每年派兵艦三四艘
隨漁船往以資保護且於其所獲之魚按百磅津貼銀一圓又加
征他國運魚入口之稅使本國之魚易於出售云 因按此舉有
三善焉爲貧民裕生計一也爲水師儲人材二也爲國家塞漏卮
三也區區布置亦富強之一著高碁焉且其地之爲英所踞者未
嘗不思奪回惜英之水師方強未敢輕舉耳兵艦漁舟耽伺其側
沙綫既熟浪颶亦諧一朝有罅則唾手收回所失之地無難矣

十三日晴

言
卷二十一
謁外部科司達告以美國駐閩葛領事辦事公正敦睦商民安之
茲接福州將軍閩浙總督書極爲嘉獎該領事如能蟬聯必於兩
國有益科司達曰美廷現不撤該領事後任則非所知因又告以
十月二十四日照覆已將此文呈諸總署徐待後命惟領照限期
已迫屆時華民必不領照應勿逼迫以顧前約科司達曰此事前
已申明例爲議院所定總統所准不能不行因謂然則本使署應
再照會駁詰科司達曰本部照覆既呈貴總理衙門何不少待且
應領照監禁與否非外部所能主應由律政部容與相商云因遂
辭出

十四日晴

日斯巴尼亞屬地格羅林島與小呂宋近向不准各國教士在彼傳教去年美國教士之在該島傳教者爲島民所逐美政府照會日國答以向不接待教士嗣美又備文駁詰日廷至今無回文想不允美廷所請也 因按教士之於亞洲可謂猖獗矣其實在歐洲之教士殊無能爲也最嚴者莫如德俄俄於教士除通都大邑外不准深入內地且限其說教之時刻不得過半時德於天主教之干犯國例者予罰不貸無可罰者則予監禁義則去年以天主教士唾紀功碑事遂不准教士出門教王之令不出於王宮之外今日人又逐之矣然則教士之猖獗護教之國之要求固不能行於強國也

十五日晴

十三日俄都來電俄國西比里亞地方各金礦所採之黃金近日分載十三馬車運至俄都有重兵護解云 因按京北奉天黑龍江興安嶺一帶產金最旺西比里亞卽毗連之省故採金如此其多也近聞越南臺灣均產金沙越南金沙由山溯中流出土番依山畜鴨中國戍兵購其鴨宰之腸中每有金沙土番不知採也故法人窺伺之臺灣金沙向歸官辦招民自採官給其值而收購之現承辦之員請於上司願每年繳銀六萬兩歸其承辦則漸有把握矣

十六日晴

西刻與梅律師商撰照會以新例不久將滿華人不願領照屆期不得監禁以符前約律師云此事彼不能允亦無辦法也蓋一月之內總統部臣均易彼自知權不我屬置之而已不如俟新總統接任後辦理云云因從之 聞俄國政府估計現年經費約五萬萬餘羅卜入欸亦五萬萬餘羅卜查俄國向來出入二欸未有如此巨者蓋入欸漸增而出欸亦遞增水陸軍餉需二千九百八十七萬七千羅卜云 因按俄國曠土漸闢糧產日多棉花日盛煤油日出金礦日開此五者年有所增而稅又加重此入欸之所以巨也出欸以興造鐵路爲巨軍餉次之移民實邊又次之皆富強之計非若土耳其之糜費正供也可畏哉

十七日 晴未刻見細雨卽止

赴上議紳圭茶會又謁英吉利士二人皆不附新例者 十五日
倫敦來電言英國議院開時英主諭議院以英國屬地徧天下政
繁事冗交涉事宜議院應悉其隱微調劑盡善現最宜速議者爲
埃爾蘭島該島離倫敦僅一海峽原不必另設議院但其人民與
英世讎僅懾於英之強並非心悅誠服其故因全島土地爲英所
奪土人耕田須向英人出租承領動受挾制生計無賴貧極思亂
宜創議院革除苛政俾安島人之心云 因按歐洲強國日夕經
營不過瘠人肥己英尤甚焉何忽爲仁義之言體恤一小島哉查
美國數十年來客民入境以埃人爲最多蓋漸將去汝空國而徒

矣今則美立新例禁歐人入境日益加嚴英既不便請於美以失國體計惟有稍寬虐政以安其心而免其遷非真能不侮不奪也
十八日晴

美國新式鐵艦名威蘇魏阿士其式獨異中有氣礮三尊專放炸藥彈子此種氣礮向有武員決其不能命中故水師部特派員一試驗近日驗得該礮出彈正直於三四里之遙命中甚準尙擬再驗如始終如一則水師部擬照式再造一二艘云 因查光緒十年直隸廣東均電美使館屬購氣礮終以不能試驗未成五年後英國曾購一尊美國亦間有置於戰艦者而究未聞試驗命中今居然命中矣 因又考從前中國定購立合同時四寸徑者彈及

六七里六寸徑者彈及八九里八寸徑者彈及十里蓋至小者亦不止及三四里矣今僅及三四里如八寸徑者則不符甚遠卽四寸徑者亦照原議減半然則購辦軍裝可不慎哉

十九日晴是日封印中夜雨雪

上議紳英吉利士來見欵以茶煙談最久詢中國民數最多每年入欵若干因答以近一萬萬紳曰何以少耶因曰中國不言利故稅甚薄取之於民者甚輕紳曰中國入口稅輕故外國以中國爲利藪而中國之工藝多失業美國稅於本國之民亦薄且出口之貨並不收稅惟重稅入口之貨及無益之物耳美國上下皆不諱言利總統諭議院必諄諄於國庫之盈虛商務之衰旺民產之增

減稅入之多寡部員議紳莫不有恒產卽如議紳之俸歲僅四千而恒產所入有十倍百倍者不諱言也歐墨兩洲之國其公舉議紳與謀國事者皆有定章非身家股實不舉蓋以能治家者必能治國也因曰如此不畏與民爭利奪民之利乎紳曰天地自然之利無窮何須爭奪彼出其才以執利權爲民興利民富而國亦富計此二十年中美國上下之富幾二十倍於前此明效大驗矣因答曰是或一道辭去已午正矣

二十日陰雪已化矣

倫敦來電言俄地近北極海口交冬卽冰船不能行兵艦船隔與修均礙故常欲圖南垂涎於土耳其波斯印度朝鮮等國思得其

海口以便兵船也英人畏其蠶食則嚴防之凡俄人有事於土耳其英必設法以伐其謀甚且發兵助土或聯歐洲各國以制之近數十年非一次矣土耳其深知此意亦暱就英自光緒五年英派兵駐土之屬國埃及土國疑忌日甚英初以救災爲辭謂埃及亂靖卽當撤兵近已十年兵猶未撤近日法國屢次詰問俄亦附和土則陰助俄法三國既合英人非得德奧義之助忍力不敵矣

因按今日之天下一弱肉強食之天下也俄遠交而近攻其長駕而遠馭俄之版圖得地球六之一英之屬地徧於五洲而其心猶未餒也前七百年元世祖混一地球其時亞細利加澳大未幾而仍分裂足爲好大喜功之監今英與俄鬪智鬪力戰則糜爛其民

而勢無兩全不戰則鴟炸相持而勢將俱斃民生之禍亟矣豈氣數使然耶

二十一日晴謝神

赴議院紳而來多茶會 泰西一千八百九十三年即光緒十八年各國鐵路計以英里美國十六萬七千七百五十五里卡拿大一萬四千八十三里墨西哥阿鎮丹共五千六百二十五里祕魯智利甚微不計此在墨洲者也德國二萬六千七百九十里法二萬四千三百十里英三島共二萬二千六百八十五里俄一萬九千三百四十五里此在歐洲者也印度一萬六千八百七十五里俄沿海邊岸八百六十五里和之屬地八百五十里法之新疆六

十五里葡之屬地四十五里中國一百二十五里波斯十八里此
在亞洲者也阿吉利亞突尼斯共一千九百里好望角一千八百
八十里野雞大山九百六十五里那太彰三百四十一里其餘小
國約三百里此在非洲者也特辣浦二千七百三三南威勒士二
千三百七十五里昆思蘭一千六百四十五里南澳大利亞一千
八百七十五里西澳大利亞一百六十五里太司默尼亞四百一
里新峇蘭一千五百九十里此在澳洲者也 因按此紀五洲之
鐵路而亞洲之日本歐洲之比利時均不及焉或以其少而遺也
美最多英合屬地計之亞於美次則德法俄此五國者其國勢何
如耶

二十二日晴

卡拿大鐵路公司來謁卽前賽可倫比亞會時相遇於兵船者談及美國水師提督安民當前南北花旗鏖戰時身經百戰兵船利鈍久已瞭然近創造一衝頭鐵艦長二十五丈闊處四丈三尺高二丈一尺入水一丈五尺容二千一百五十五噸每一時行一百一十六里其衝頭爲鋼質重十噸餘僅費九十三萬圓云 因按自鐵艦創而各國競出心思以闢巧究之各有短長未有有利而無弊者頭等戰艦質堅礮巨然苦於笨滯而不能避水雷巡海兵船來往迅速又苦於質薄而不能當巨礮衝船之式英法德皆有之其創始實原於奧奧創斯式戰於大洋當者立破各國皆派員

往觀遂傳其法十年前英之兵船名阿爾及爾行於大洋衝船公
甲駛於其後不相期而相觸公甲之衝頭衝入阿爾及爾船身裂
孔八尺當時卽沈英人喧傳謂如強弩之穿魯縞今美國又師其
法並非新奇大約該提督亦深知此式之能制勝也

二十三日晴

戌刻奉 總理衙門電云二十二日奉 旨楊儒以四品京堂

候補出使美日祕濠 智利國以俄國兵船到境詢問駐智利俄
使俄使答以並無他意不過查探各口商務情形耳聞俄人實欲
向智利阿鎮丹二國借一口岸修築埠頭以爲兵船添煤之計云

因嘗疑俄於太平洋岸議設船塢有覬覦墨洲之心今漸露端

倪矣墨洲之北監札加地方久爲俄有俄之兵船又於祕林海等
權則其不讓英美之意可見蓋墨洲開闢未久曠地極多美國而
外率皆小國其地本易取而取其地又可以耕且地氣中和不似
俄之苦寒開墾移民均爲有益然則過此以往墨洲其不靖乎

二十四日晴夜雪

梅律師來謁言上議紳可六請將中國歷年駁詰苛例照會案件
交議院公議總統已允發交議院惟議院諸紳只能向議院公閱
不能帶回難知其詳請刊印二千本除分送議院按名二本外餘
者分送各省公正官紳官紳閱之必有公論則新任新議院到時
可以再議如以爲可則此刊印之費須由使館自籌因允之又聞

檀香山所派之員到此已數日外部科司達本將告退又爲此事所羈絆美國咸謂此事重大殊難決斷日內外部與檀員所議甚爲祕密外人不得而知大約檀國願歸美國保護而美國亦垂涎於檀蓋以檀國現在攝政之人卽係美人故想當然耳然英國必起而爭之美廷之不敢決者此也

二十五日 微雪陰

近古巴之三德明哥島國所借他國錢債甚巨向由威善多布銀行交息今該銀行將此權利鬻與美商業已成議卽於一千八百九十四年三月將關稅由美商收以爲交債息之用并准美商興添鐵路以收運載之利以五十年爲期不准他國攙越識者以爲

該國將爲美所并云 因觀於此而得爲邦之利病焉泰西各國皆有國債其借諸本國者其息楚弓楚得不至於貧如英德法美各國是也其借諸外國者日朘月削必至於匱如荷土墨西哥三德明等國是也英法德美四國於本國之鐵路既興凡他國之未興鐵路者則欲代爲之興且不願他國之攘奪彼何爲哉蓋利之所在也然則欲富強者當以興鐵路爲先而以借國債爲戒

二十六日陰

謁梅律師上議紳傅喜士之女亦到聞近來歐洲各國於馬兵步兵之外又增輪兵蓋泰西所創獨輪車以大輪行以小輪爲舵定所向上有一座人坐其上以足踏機迅如快馬英國因設學堂以

此訓兵居然可用德法義等國均派員赴英學習遂卽創設輪隊
美國各省今亦仿之以爲便捷查輪隊與馬隊不同馬隊利於陷
陣輪隊利於調兵調兵貴速此輪每一時辰能行三四十里已試
驗矣 因按古者師行日三十里今之輪隊十倍其速鐵路百倍
其速蓋古尙持重今尙便捷也禹貢九州相距遠者只千餘里春
秋列國犬牙相錯只數百里晉人襲鄭卽云鄙遠其實山西河南
實鄰近耳今之戰者皆戰於數千里之外甚且數萬里以古法行
之必緩不及事矣美國南北花旗之戰北無鐵路屢戰屢敗迨鐵
路成而遂勝之此兵貴神速之大驗也

二十七日陰

美國希卡果明年賽會已由德國人造電氣燈一座設機器於房
另以氣球升電氣燈於空中然後發光其光可抵一萬六千萬枝
燭光六十里內照耀如同白晝途人相逢鬚髮可數詢爲奇異云
因按電氣之用愈推愈廣近謂電氣可以祛疫則通於醫又謂
電氣可以生物則通於稼泰西百年前有奇人焉言泰西之運盛
極將衰有詢其衰在何時者則曰鐵行於水面而不沈光燭於宵
深而不夜此其時也其言果驗則泰西之運其將衰乎

二十八日晴

金山商董所延大律師博郎來會爲駁禁工苛例也當卽偕至梅
律師宅面商辦法梅律師謂議院卽日將散中國使館公文雖由

總統交議院倉卒未必議成須待秋冬議院開時方可就緒耳又聞美國女教堂設在土國麥羅沙省土人以其有觸犯官長之事焚毀之教士訴於地方官不理美駐土公使函請德國駐麥省領事查明緣由再向土廷詰問云 因查民教不和之事各國常有德之於教士也或予罰鍰或予監禁俄之於教士也或限其設教之地或限其宣教之時西班牙土耳其於教士皆焚逐之義大利則禁錮之教士皆無以報復焉至亞洲則不然其故何耶

二十九日晴

西報紀日本下議院呈遞日廷奏章一扣茲譯其略云爲請旨議改條約四端以圖振興而收利權事竊查一千八百四十八年至

十九年大權旁落外侮沓來遂致有城下之盟立此不公條約藩
王逞雄海內強鄰偪迫境中明治初年是以有兵戎之舉所可惜
者前與外國所立不公之約未能改換耳查俄國有自主之權凡
外人托庇宇下自應歸我管轄稅務亦應在我權衡今爲條約所
限不可措手殊失國威臣等每一思維歎歎欲絕外國人在我國
旅居不隸我國權治祇受彼國公使領事治下一如在本國然我
日人往彼國何以須遵彼之管束至稅務又格於條約不得我行
我法我國貨物至彼入口則任彼重稅是我有權彼則奪之彼重
征我則依之此我商務技藝之難以振興國庫之所以日削者職
是之故雖皇上深宮劫愆勵精圖治亦未由振發也推其初與外

國訂約不深慮於日後而苟安於目前想當日秉鈞之員未深諳外國情形率爾立約致有此掣肘之患臣等請嗣後遇換約之期宜爲彌縫補苴之計所有牽掣我國之款亟圖改換謹將議就四端敬爲我皇上陳之一請外人在日本國居住者必須山日國管轄二稅務如何征收皆任我朝自立主意外國不得預聞條約不能限制三有約之國通商口岸我國均沾其利不得畸重畸輕四我國政治外人不得干預以上四款伏求 皇上睿智如神俞允他年條約更換之期望將四款增入云 因按日本議院所陳確中亞洲立約之弊故錄之以備參考非僅秦山土壤河海細流之義亦受病相似而同病相憐也且中病之藥也

三十日晴

二十六日巴黎來電言俄人多詐將有求於德則籠絡法國將有求於法則籠絡德國近日俄主意似向德非真與德好也不過又將有求於法云耳 因按法人所以詆俄者有似憤懣然亦誅心之言也俄之所以處德法者有似狡猾然實縱橫之術也俄主之意以爲過與爲好則相與玩之過與爲讎則羣起謀之皆非計之得者也我意向法則法喜而德懼我意向德則德喜而法懼一喜一懼而喜者爲吾之援懼者不敢爲吾之敵吾乃可乘間而逞吾志焉莊子曰譽吾道者欲與吾交皆吾貨者欲與吾市春秋之搜伐列國之縱橫皆是道也

光緒十八年日記成因就各國之交涉而論之德奧義三國聯盟俄法二國亦聯盟英國外爲中立而內實欲德奧義之合俄法之離蓋以德奧義所志在昇平而俄法所志在攻取也德奧俄時疏時親兩君時相見而仍時有責言其於奧義則時時爲好會情意相洽且休戚相關矣埃及新君之立俄法頗有責言於英其人若不聞而俄法亦不敢先動英脅埃及以易外部俄因勃國以詰土耳其其義與巴西有違言日本與葡萄牙不洽皆以強而懾弱英不助阿富汗以敵俄美不取夏威夷以結英皆以強而讓強俄世子至奧而奧主躬迎法海軍至英而英后躬勞皆以禮意聯邦交若夫美輸粟以振俄飢而俄逐美遊歷之士一似以怨敵惠其實美

禁俄人入境俄徵示其幾耳入欸則英美均近四萬萬圓德法俄
奧義日入不敷出德法貸於本國俄貸未成奧義貸諸他國日斯
巴尼亞則不讓貸而議開源節流亦補救之善策此三十年中美
之民產增至六倍英之民產所增不及一倍美之礦產值銀三萬
萬餘圓煤油值銀四千四百十九萬餘圓殘兵郵欸本年需銀一
萬二千餘萬圓出入甚鉅英之洋藥值銀五千萬餘圓又征税一
千九百餘萬圓則中國之蠹也入口之稅各國膠擾無休英美以
卡拿大比鄰兩國入口之稅時相齟齬卽時相抵制法日修約商
議彼此入口酒稅終不成議而至於互增美於古巴哥司答立曼
訂報施之約而出口之貨驟增美增布帛入口之稅而英之紡織

失業哥司答立憂增美貨入口之稅美抵制之美增墨西哥貨物入口之稅墨亦抵制之尼格拉增入口之稅以補不足法國新訂稅則征英德奧土四國爲輕征義日葡三國爲重又加煤油入口之稅或曰防火災也英屬新金山加美國入口之貨稅卡拿大加華人入口之身稅至於煙酒之稅德國一加再加美與俄亦議加蓋加其所可加也軍政則俄法屢增兵德亦增兵奧與義始因費絀而不欲增兵終仍增兵則騎虎難下之勢也英與美未聞增陸兵而戰艦則遞年而增蓋勇夫重閉之心也造船以英爲最速頭等戰船其成僅需二年有餘巨礮則英之阿姆斯脫郎廠與德之克虜伯廠各擅其長煉鋼之法德與美均同其堅而德之長尤在

於能巨法以電綫爲旗鼓德以氣球窺俄營以巨礮電燈賽會美
創新式之炸彈思新法以添煤以藥衣禦槍彈以衝頭破敵艦以
分節而造鉅礮以鏡光而測敵船以沈水之船水底之礮爲攻守
造開河機器至十四萬六千匹馬力皆新法也驅事則法已滅非
洲之達河味國踞格羅力殺島德於非洲戰事先敗後勝又擬以
資購葡國所屬之莫三鼻給島英義日三國謀分裂摩洛哥哥而終
不成英已踞畢太力太島吉白海島紐西蘭島又規愛立斯島喬
士頓島蓋開疆拓地小國漸不能自存矣俄之陸隊時逼波蘭時
臨德境奧境且已加兵於阿富汗歲歉民饑道殣相望而兵不戢
其斯爲北方之強與商務向推英今自美加入口稅倫敦紡織各

廠之失業者數萬衆自金磅日漲商船之置閒者數百艘似已不加昔日惟新金山之利日興緬甸之鐵路漸建印度之產漸盛防漸固蘇彝士河之船稅日旺股票之價亦日增尙不至失之東隅法國近日留心養蠶蠶絲日興將奪中國之利其通國工藝至一千餘萬人似乎重末輕本然而富矣德之制礮日巨制槍日精增輪船公司於大西洋以分英法之利其俗勤勞而儉樸則氣象方新也俄國荒地日闢煤油日多農務日興鑛產日盛西比里亞出金日旺將來鐵路成後移民既便不患人稀曠土可開不患人滿固將運笨貨以出口驅大隊以開邊富強之謨殊可畏矣美國商務之盛全山國家爲之開源以前所建鐵路由大東洋而達西洋

一萬餘里凡經過之荒山僻壤其所產者皆能運出故利日興今於荒土播種之後又慮穀賤傷農爲之開水道浚內河增分支鐵路俾易於轉運出口故其麪遂至於徧給五洲視越南緬甸暹羅米粟雖多而未興鐵路利權之操於人者不同也國中船廠林立而國家立例不准取材異國亦不准商人購船於他邦其有向歐洲購船者則重其稅幾埒於成本又禁其用美國之旗故利不外奪而內海內江之運載又不使他國之船攬越其間故利無所分近年之禁各國工人入口者卽此意也日本自創輪船以後此十年中獲利銀二百餘萬圓惟爲夏威夷國內亂力爭保護幾致與美不和近亦與葡不洽然考其所言本國與泰西立約之事切中

時病國有人焉中美交涉惟禁工爲錯節盤根自陳任以來每下
愈況近議紳中南黨日盛如可六安多羅火街好德等均持正論
而總統亦信其言可六已上書請將中美交涉文牘交議院再議
總統已如所請將來秋冬開議院時或可除苛華民庶有豸乎